

2/2015 UDALEKO OSOKO BILKURA

2015EKO MARTXOAREN 30EAN IZANDAKO OHIKO OSOKO BILKURAREN AKTA

BERTARATUTAKOAK:

ALKATEA:

Pedro M^a Estanga Lasa

ZINEGOTZIAK:

Izaskun Jáuregui Saizar
Aitor Gurrutxaga Aranzasti
Aratz Luisa Urkola
Miren Josune Eizmendi Manterola

IDAZKARIA:

Nekane Agirresarobe Etxeberria

Anoeta Hiriko udaletxean, 2015eko martxoaren 30ean arratsaldeko seiak direla, eta ondorio horretarako deia egin ondoren, Udaleko Ohiko Osoko Bilkura antolatu da, Pedro M^a Estanga Lasa Alkate jaunaren Lehendakaritzapean, Kepa De la Iglesia eta M^a Carmen Egurza ez dute ezin etorria adierazi eta Maialen San Sebastian eta Mikel Ayerbe lana dela eta ezin etorria adierazi dute; eta Nekane Agirresarobe Etxeberria andrea, Idazkari lanetan aritu naiz.

1.- 2014KO AZAROAREN 24EAN, ABENDUAREN 29AN ETA 2015EKO URTARRILAREN 26EAN OSPATURIKO AKTEN BERRI EMATEA.

2014ko azaroaren 24ean eta abenduaren 29an ospaturiko bilkuren aktak irakurri eta aho batez onartuak izan dira, 2015eko urtarrilaren 26ko akta onartzeko dago.

2.- EBAZPENEN BERRI EMATEA, 2015EKO URTARRILAREN 16TIK MARTXOAREN 13A, 26 ZENBAKITIK 113 ZENBAKIRA, HAU BARNE.

2015eko urtarrilaren 16tik martxoaren 13a bitarte, 26 zenbakitik 113 zenbakira biak barne, bitartean izaniko ebazpenen berri ematen du alkate jaunak, Korporakideek jakinaren gain geratuz.

3.- EH BILDU TALDEAK AURKEZTURIKO ONDORENGO MOZIOAK ONESTEKO PROPOSAMENA:

- MENDEBALDEKO SAHARAREN ALDEKO MOZIOA
- MARTXOAREN 8A, NAZIOARTEKO EMAKUMEEN EGUNA
- MARTXOAREN 21A, ARRAZAKERIAREN ETA XENOFOTIAREN NAZIOARTEKO EGUNA.

EH Bilduk aurkezturiko mozio hau aho batez onartu da:

“Anoetako Udaleko EH BILDUKO hautetsiek otsailean eta martxoan izan diren EGUN jakin batzuen harira ondorengo adierazpen instituzionalak aurkezten ditu eztabaidatu eta onartuak izateko:

MENDEBALDEKO SAHARAREN ALDEKO MOZIOA

2015eko otsailaren 25ean Saharar Errepublika Arabiar Demokratiakoa (SEAD) aldarrikatu zeneko 39. urterurrenean, Saharar jendartari eta kasuari atxikimendua adieraztearekin batera Nazio Batuaren Erakundeari deskolonizazio prozesua bukatu eta autodeterminazioarako eta independentziarako eskubidea aitortzea eskatzen dio Anoetako Udalak. Horrekin batera, Mendebaldeko Sahararako herritarren oinarritzko giza eskubideen etengabeko salaketa egiteaz gain, adierazten du bereziki gaitzesten duela Hassana Aalia ekintzaileari Espainiako barne ministerioak asilo eskaera ukatu izana. Azkenik, Saharar herriarekin elkar lanean aritzeko konpromezua berresten du Anoetako Udalak.

MARTXOAREN 8a, NAZIOARTEKO EMAKUMEEN EGUNA

Emakumeen Nazioarteko Eguna dela eta, Anoetako Udaleko hautatsioak, emakume eta gizon askeen Euskal Herria helburu lan egiten jarraitzeko konpromisoa hartu nahi dugu:

- 1.- Gure herrian biolentziarik gabe bizitzeko bitartekoak jarritz.
- 2.- Gure herriko jardueretan parekidetasun egoerak eman daitezten lanean jarraituz, bereziki, emakumeei hitza eta protagonismoa emanez.
- 3.- Udalarekin lanean aritzen diren eragile desberdinei parekidetasun irizpideak bermatuak izan daitezten eskatuz.

MARTXOAREN 21a, ARRAZKERIAREN ETA XENOFOBIAREN NAZIOARTEKO EGUNA.

Arrazakeria eta Xenofobiaren Nazioarteko Eguna dela eta, Anoetako Udalak ondorengo adierazten du:

1. Herrian bizi diren pertsona guztiak dira herritarrak, edonon jaiotak direla ere, eta, herritar guztiok ditugu eskubide eta betebeharrak berberak.
2. Herrian dagoen kultura eta hizkuntza aniztasuna aberasgarria da herriarentzat, eta, horiek babestu eta indartzeko lanketa egingo da, betiere, Euskara kohesioa eta komunikazio hizkuntza bezala aitortuz.
3. Bide horretan elkarbizitza da gakoa. Horretarako, beharrezkoa da elkar ezagutza eta elkar aitortza ere.

Anoeta, 2015eko martxoaren 30ean”.

4.- EH BILDU TALDEAK ERREGISTRO ZIBILAREN PRIBATIZAZIOAREN AURKAKO MOZIOA ONESTEKO PROPOSAMENA.

EH Bilduk aurkezturiko mozio hau aho batez onartu da:

“Erregistro Zibilak gure bizitzaren gertaera garrantzitsuenak jasotzen ditu. Bertan erregistratzen dira norberaren jaiotza, ezkontza, seme-alabak eta heriotza. Baita hasierako inskripzioa aldatzea eragiten duten bizi gorabeherak jasotzeko espedienteak ere izapidetzen dira hor: aitatasun edo amatasun aitortzea; adopzioa; ezgaitasun-deklarazioa; tutoritzak; izen, abizen edota sexu aldaketak; nazionalitatea eskuratzea; pentsio publikoak edo aseguruak edo

osagai pribatuak edo enpresarenak kobratzen jarraitu ahal izateko gure nagusiek hain beharrezkoa duten bizi-agiria ematea. Horregatik, funtzionario publikoak izan dira Erregistro Zibila eraman dutenak betidanik; izan ere, duela zenbait urte Justizia Ministeriko (edo erkide autonomiko Justizia saileko) funtzionarioek bermatzen dituzte jasotako datuak eta, era berean, legalki dagozkion pertsonari haien eskuratze libre eta doakoa.

Bake epaitegiek herritarrei Justizia administrazioa hurbiltzen diete, alderdi diren edozein prozeduraren inguruko informazio orokorra eskaintzen dietelako, eta honez gain, Erregistro Zibileko izapideak betetzen dituztelako. Horrela, herritarrek ez dute horrelako tramiteak egiteko hiriburueta joan behar, hainbat herritan bake epaitegia dagoelako.

Azken urteetan gainera, Herri Administrazioak diru inbertsio handia egin du Erregistro Zibilaren jarduna modernitzatzeko; zerbitzu honi dagozkion dokumentuak informatizatu eta digitalizatu eta bertan dauden datu guztientzako sarbide eta erabilpen segurua eta kontrolatua izateko programa martxan jarri du. Zehazki, diru publikotik 128 miloi euro baino gehiago inbertitu dira teknologia berri hauetan.

Alderdi Popularraren gobernuak Erregistro Zibila esku pribatuetan utzi nahi du, horren kudeaketa merkataritza erregistratzaileei emanez, bake epaitegien eta gaurko barruti judizialen existentzia zalantzan jarriz. Horrela jasotzen da Botere Judizialaren Lege Organikoa eta Auzitegi eta Epaitegien Mugape eta Antolaketari buruzko Legea aldatzeko aurreproiektuetan, eta uztailearen 4ko 8/2014 Errege Dekretu Legean.

Aurtengo otsailaren 20an, PNV:EAJ, Euskal Herria Bildu eta Partido Socialista de Euskadi-Euskadiko Ezkerra alderdien babesarekin, Eusko Legebiltzarrak legez besteko proposamena onartu zuen Erregistro Zibila gaur egun dagoen moduan mantentzeko, hiritarrei zerbitzu publikoa eta dohainikakoa eskaintzeko.

Zehazki, pribatizazioak ekarriko ditu:

1. 3.500 langile publikoen lanpostuen galera. Hauek prestatuak izan dira, eta gaitasuna eta espezializazioaren jabe dira Erregistro Zibil arloan.
2. Bake epaitegiak egungo zereginez hustea lehen neurria da, euren desagertzea bilatuz gerokoan. Norabide horretan, Botere Judizialaren Lege Organikoan eta Auzitegi eta Epaitegien Mugapen eta Antolaketari buruzko Legean egindako aldaketek aukera ematen diete, ez soilik bake epaitegiak desagertzeko aukera, baizik eta barruti judizial gehienak ere, epaitegiak hiriburueta soilik kokatuko dituztelarik.
3. Tasak jarrito dira zerbitzua ematearen truke. Egia da 8/2014 Errege Dekretu Legeak esaten duela zerbitzua doakoa izango dela, baina Merkataritza Erregistratzaileak, lanbidera sartzeko erari eta monopolio gisa duten zereginari dagokinez, funtzionario publikoak izan arren, muga-zergen bitartez kobratzen dute egindako zerbitzua; eta etorkizunean, Erregistro Zibilean egin beharreko izapideak ere horien bitartez kobratuko dituzte, hau da, herritarrei nahitaezkoak zaizkien jaiotze bat erregistratu, familia liburua, heriotza, ziurtagiriak, bizi eta egoera agiriak, etab... Gainera, lege berriak erregistratzaileen ahalmenak handitzen ditu eta inskribatu beharreko kontuak ikaragarri puzten (edozein ahalorde, helbide inskripzioak, pentsio-planak, testamentuak...), hauek guztiak, jakina, herritarrek ordaindu beharreko dituzte Horrela, hemendik aurrera Erregistro Zibilak merkatal

- jarduera izango du, eta egite bakoitzak bere salneurria izango du, eta jasotako dirua gutxiengo pribilegiatu horientzat izango da.
4. Datu babesaren segurtasun falta. Merkataritza Erregistroko langileak ez dira funtzionario publikoak baina herritarren datu pertsonalarako sarbidea izango dute, nahiz eta funtzionario publikoak ditugun isilpeko eta sekretuko betebeharrak ez izan.
 5. Azken urteetan Erregistro Zibila modernizatzeko egindako inbertsioa esku pribatuetarara pasatuko da, kudeaketaren emate horrek baitakartza baliabide material guztion ematea ere. Baliabide materialak ematea diru publikoa xuhutzea da; inbertsioak eginak daudelako, baliabide materialak ordainduak, azpiegiurak eginak eta giza baliabideak kontratatuak, formatuak eta gaituak. Hots, diru publikotik 128 miloi euro oparituko zaie Merkataritza erregistratzaileei euren onerako.
 6. Erregistro Zibilean gordetzen diren gure historia pertsonalerako, familiarrerako eta herri gisa duazkagun datuetarako sarbidea murriztea. Gure arbasoen, haien jatorriaren eta bizimoduaren gaineko informazioa aurki baitaiteke bertan.
 7. Hau guztia dela eta, Anoetako Udalaren Osoko Bilkurari eskatzen diogu:

- Merkataritza erregistratzaileei Erregistro Zibilaren kudeaketa ematen dion uztailaren 4ko/8/2014ko Errege Dekretu Legearen aurka ager dadin.
- Halaber, adieraz ditzan bake-epaitegiak eta gaurko Erregistro Zibilaren bulegoak izan behar direla Erregistro Zibilak kudeatzen dutenak, herritarrei zerbitzu publikoa eta dohainikakoa eskainiz, orain eta betiko.
- Kontutan izanda aipatutako EDLa indarrean sartuko dela 2015eko uztailaren 15ean eta aurtengo otsailaren Eusko Legebiltzarrak onartutako ebazpenarekin bat eginda, udal honek eska diezaion Eusko Jaurlaritzari Erregistro Zibila kudeatzeko eta betearazteko eskumenak jasotzeko negoziazioak azkar ditzan”.

5.- EH BILDU TALDEAK TORTURAREN AURKAKO ETA GIZA ESKUBIDE GUZTIEN ALDKEO MOZIOA ONESTEKO PROPOSAMENA.

EH Bilduk aurkezturiko mozio hau aho batez onartu da:

“TORTURAREN AURKAKO ETA GIZA ESKUBIDE GUZTIEN ALDEKO MOZIOA.
Otsailaren 13an 34 urte bete ziren Joxe Arregi hil zenetik Polizia Nazionalaren estutan 9 egun eman ondoren. Harrez geroztik tortura urtetik urtera salatu dugu, kalena eta erakundeetan. Zentzu horretan, Esukal Herrian milaka eta milaka herritarrek salatu dute tratu txarrak jasan izana Estatuko polizia indarren eskutik.
Gainera, aurtien jakin dugu Giza Eskubideen Europako Auzitegiak Espainiako Erresumaren aurkako kondena-epai berri bat eman duela Euskal herritar batek salatutako torturak ez ikertzeagatik. Epai honekin, Giza Eskubideen Auzitegiak dagoeneko bost kondena-epai eman

ditu Espainiako Estatuaren aurka, Euskal herritarrek aurkeztutako tortura-salaketak ez ikertzeagatik.

Horregatik guztiagatik, Euskal Herrian oso testuinguru garrantzitsu batean gaudela aintza hartuta, non oraina eta etorkizuna eraiki nahi dugun giza eskubideen errespetuan oinarrituta, Anoetako Udalak erabaki du, mozio honen bitartez:

1. Komisarietan tratu txarrak ahalbidetzen dituzten egun indarrean dagoen legedia behingoz eta behin betiko indargabetezko eskatzea, Lege Antiterrorista indargabetu eta txilotuen inkomunikazioa bertan behera utziaz.
2. Funtsezkoa den eskubide honen urraketa pairatu duten pertsonen sufrimendua aitortu eta erreparatzea.
3. Auzitegi Nazionalari eskatzen dio tortura eta inkomunikazioa pairatu dituzten atxilotuen kontrako prozesu judizial guztiak berrikusi eta bertan behera utz ditzala.
4. Akordio honen berri ematea.”.

6.- EH BILDU TALDEAK, JAURLARITZAK BULTZATU DUEN UDAL LEGE EGITASMOAREN AURREAN AURKEZTURIKO MOZIOA ONESTEKO PROPOSAMENA.

EH Bilduk aurkezturiko mozio hau aho batez onartu da:

“JAURLARITZAK BULTZATU DUEN UDAL LEGE EGITASMOAREN AURREAN ADIERAZPENA.

Eusko Jaurlaritza bultzatzen dabilen Udal Lege egitasmoaren aurrean ANOETAko Udalak zera adierazi nahi du:

Udal Lege egitasmo hau berandu dator. 35 urte kosta izan zaio Jaurlaritzari egitasmo hau martxan jartzea. Eta denbora honen ondoren gauzak ongi egin eta protagonismoa udalei eman ordez, presa handiekin jarri da martxan. Hainbeste denbora pasa ondoren merezi zuen lasaitasunez, modu zabalean eta sakonki zein Udal eredu nahi dugun eztabaidatzea. Horren ordez uneko interes politiko eta “presak” agindu dute. Udalen ordezkarien ahotsa zuzenean entzuteko eta udal ordezkarien ekarpenak biltzeko ez da inolako mekanismorik abian jarri. Ez da zilegi udalengan halako eragina izango duen egitasmo bat aurrera eramateko udalen parte-hartzerik ez bilatzea.

Lege egitasmoak parte-hartzeaz asko hitz egiten du. Aldiz, legearen kudeaketan lege honen onuradun/kaltetu nagusi izango direnei ez zaie parte hartzeko aukera berezirik eman. Legearen lanketan ez da udalen kezka, behar edo iradokizunik jasotzeko ahaleginik egin. Legearen prozedura parlamentarioan ere ez da norabide horretan urratsik aurreikusten. Udalen ordezkariak guztia EUDELen esku uzten da. Zoritxarrez, gaur egun EUDELeK ez ditu EAEko udal guztiak ordezkatzeko. Udal eta udal ordezkarien parte-hartzea ezin daiteke soilik EUDELen ekarpenetara mugatu. Udaletan lanean diharduen kidegoarengana zabalduko diren bestelako mekanismoak ezinbestekoak dira. Gainontzean, egitasmo honek hastapenetik konpon gaitza den arazoa izango du bere baitan.

LEGEAK PROPOSATZEN DUEN FINANTZIAZIO EREDUA: udalei hainbat eskumen berri bereganatzeko aukera onartzen zaie. Aitzitik, ez da oso argi geratzen eskumen horiek

guztia garatzeko finantziario bide berriak zeintzuk izango diren. Aurreikuspen batzuk egiten dira baina oso azaletik. Horrekin udalak gaur eguneko egoera berdinean geratzen dira. Eskumenekin batera finantziario iturri berriak aurreikusi beharko lirarteke. Bata bestea gabe egiteak desoreka handiak sortzen dituelako.

Bestalde, jada udalek ez dagozkien baina garatzen dituzten eskumenak onartzen zaizkie, baina finantziario bide berririk ez. Tamalez, hori horrela hainbat udalek ezingo liokete gaur egungo egoerari eutsi.

Ez da instituzioen arteko kuota eguneratu edo egokitze urratsik ematen. EAEko erakundeen arteko baliabideen banaketa Ekarpen Legearen arabera da. Bertan koefiziente bertikala eta horizontalen bidez banatzen dira baliabideak. Eusko Jaurlaritzak %70,04 jasotzen du eta gainontzeko %29,96 Aldundien eta Udalen artean banatzen da. Koefiziente horien moldaketa edo eguneratzeak ahalbideratu beharko lituzke eskumen berriak garatzeko finantziario nahikotasuna.

HIZKUNTZA: Indarrean dagoen euskararen legea oinarritzat hartuta, Udalen Lege honetan, hizkuntzaren erabileran, euskaraz hitz egiteko borondaterik ez duten pertsonen eskubideak lehenesten dira. Era berean Euskara hutsean bizi nahi duten herritarren eskubideak bortxatuz. Udalek euskara hutsez jarduteko duten borondatea indartu eta babestu egin behar da. Lege honek ez du bere horretan hori bermatzen eta horretarako aukera bikaina galtzen da. Hizkuntza eskubideen bermean aurrera urratsak eman behar dira. Urrats horiek legeak berak espresuki bildu behar ditu.

UDAL AUTONOMIAREN DEFENTSA: hitzaurrean adierazpen garrantzitsuak egiten dira norabide horretan. Ildo beretik, artikulatuak ere hainbat aipamen gordetzen ditu. Tamalez, hori guztia filosofia hutsean geratzen da. Momentu honetan badira zenbait lege sektorial tramitazioan (EAEko portuen kudeaketarako lege egitasmoa, Funtzio publikoko legea,...) udalen hainbat eskumen bertan behera utziko lituzketenak. Hori da ekidin beharreko jardura. Izan ere, lege honetan autonomiaren defentsa egiteak ez du ezertarako balio gero praktikan beste lege sektorial batzuen bitartez urratzen bada. Hitzaurrean ez ezik, artikulatuaren bidez ere bermatu behar litzateke hori guztia. Udal lege honek lege marko izaera izan dezan neurriak hartu behar dira. Hartara, gerora abiarazten diren lege sektorial guztiek lege egitasmo hau errespetatu beharko lukete.

Bestalde, udalek eskumen berriak eskuratzea euren kaudimenarekin lotu nahi du legeak. Hori udalen autonomia defendatzearekin zuzenean kontrajartzen da. Udalek kudeatu beharreko eskumenen ardatzak ezin du ogasun baldintzetan oinarritu. Autonomia lokalaren defentsak beste oinarri batzuk eduki behar ditu: gertutasuna, zerbitzuen kalitatea, herritarren onura,...

Lege honek salto kualitatibo bat suposatu beharko luke. Zoritxarrez alor jakin batzuk arautzera mugatzen da. Oinarritzko legedia estatukoak izaten jarraituko du. Hortaz, EAEko udalen inguruabar guztia arautzeko erronkari eutsi ordez, bestelako interesak ahalbideratzen dira. Bien bitartean, EAEko udalek legeri espainiarrera erremittitzen jarraitu beharko dute.

EUDEL: erakunde honen aldeko diskriminazio positiboa burutzen da lege egitasmo honetan. Lege honek udalen mintzakide bakartzat, hartu nahi du EUDEL. Aitzitik, EUDELEK EZ DITU EAEko UDALEN %40 ORDEZKATZEN. Udalen ordezkari burutzen dituen elkarteek hitz egin beharko luke legeak eta ez EUDELi buruz espresuki. Udalen kontrolerako

urrats garbia da horrekin guztiarekin eman nahi dena. Hori ez zaigu inondik inora bidezko iruditzen.

TOKI ERAKUNDEAK EZ DIRA AINTZAT HARTZEN: tokiko erakundeen legea izan ordez udalen lege egitasmoa bultzatu nahi izan da. Udalaz azpiko erakundeak ez dira aintzat hartzen eta horiek gure herrien antolaketan izan duten garrantzia ez da ageri. Gero eta indar handiagoa duten eskualdeen eta kuadrilen errealitateari ere ez zaio heltzen. Gainera ez da udal eta foru instituzioen artean dagoen errealitatean sakontzeko urratsik ematen.

HERRITARREN PARTEHARTZEA: herritarrengandik gertuen dauden erakundeak izanik herritarrekin zuzenean lan egiteko bitartekoak jarri eta sakondu behar dira. Kultura berri bat sustatu behar da. Horretarako lege egitasmo hau erabakigarria izan daiteke. Legeak parte-hartzeari aipamen bat egiten badio ere, ez du behar adina baliabide jartzen horretarako. Aukerazko tresna bezala aipatzen da. Urrats zehatzak emateko baino espedientea kunplitzeko barnebiltzen ditu parte-hartzeari buruzko edukiak.

Bestalde, ez da ezer egiten udal funtzionamenduan herritarren parte-hartzea ahalbideratzeko: ez plenoan, ez batzorde informatiboetan,... Herritarrentzat intrintsekoak beharko luketen hainbat eskubideren (informaziorako eskubidea, aintzat hartua izateko eskubidea...) inguruan ez da aipamen bakar bat egiten.

EUSKAL HERRIKO BESTE INSTITUZIO PUBLIKOekin HARREMANTZEKO NEURRIAK: ez da inolako aipamen zuzenik egiten Euskal Herriko beste herrialdeetako instituzio publikoekin harremanak ahalbideratzeari begira. Gure iritziz hori sekulako gabezia da. Lege egitasmo hau probestu beharko genuke harreman inter-instituzioekin. Gaur egun hainbat egitasmo martxan dira Euskal Herriko beste herrialdeetako instituzioekin elkarlanean gauzatzen ari direnak. Horiek, berriz ere, arauketa zehatzik gabe eta, larriagoa dena, inolako bermerik gabe geratuko lirateke.

Horregatik guztiagatik, ANOETAko Udaleko Osoko Batzarrari honako puntu hauek onartzea proposatzen zaio:

- 1.- ANOETAko Udalak Jaurlaritzari lege egitasmoaren prozeduran epe luzapen bat egin dezala eskatzen dio, Gipuzkoa, Bizkaia eta Arabako Udalei ekarpenak egin ahal izateko aukera irekiz.
- 2.- ANOETAko Udalak, Jaurlaritzari Udalen aldetik egiten diren ekarpenak bideratu, sakondu eta eztabaidatzeko prozedura aurkeztu dezan eskaten du.
- 3.- ANOETAko Udala, mozio honen zioen atalean aipatzen diren gaien inguruan eztabaidatu, irizpideak adostu eta ondorioak bideratzeko bitartekoak jartzeko eskatzen dio Eusko Jaurlaritzako Herri Administrazio eta Justizia Sailburuari.
- 4.- ANOETAko Udalak, Udal zein Toki Entitateen autonomia indartzeko norabidean urratsak emateko deia egiten du. Orain artean udalak, egitura instituzionalaren azken terminalak izan dira eta egoera hori aldatzea funtsezkoa da. Subsidiaritate Printzipioa oinaritzat hartuta, herritarrengandik gertuena dauden instituzioak izaki, Udalak zein gainerako Toki Entitateak sendotzearen aldeko apustua egitea ezinbestekoa da.
- 5.- Erabaki hau Eusko Jaurlaritzako Herri Administrazio eta justizia Sailburuari bideratuko zaio. Euskal Herrian, 2015eko martxoan. EUSKAL HERRIA BILDU”.

7.- ESPAINIAKO GOBERNUAREN ORDEZKARIAK EUSKARAREKIN DUEN JARRERAREN AURREAN, ANOETAKO UDALAREN ADIERAZPENA.

UEMAk aurkezturiko mozio hau aho batez onartu da:

“Espainiako Gobernuaren ordezkaria udalen jardunean gauzaten ari den esku-hartzeak bete-betean harrapatu gaitu UEMA eta bertako udalak. Kontratazioetako hizkuntza irizpideak, diru-laguntzetarako hizkuntza irizpideak, aktak euskaraz bidaltza edota udalak eskalduntzeko adostutako hizkuntza irizpideak susmopean jarri dituzte. Bi udalek UEMAn, Udalerri Euskaldunen Mankomunitatean sartzeko hartutako erabakiaren aurka ere jo du Espainiako Gobernuaren ordezkariak.

Horrela, udalen eguneroko jarduna eta udalok euskara sustatzeko egiten ari garen lana baldintzatzen dute. Administrazio publikoak hainbat zerbitzu erdara hutsean eskaintzen dituen bitartean, herritarren hizkuntza eskubideak errespetatzeko prestatuta gauden udalak dira susmopean jarri nahi izan dituztenak.

Egoera larria da. Euskararen ofizialtasuna bera ari dira zalantzan ipintzen. Teorian euskara zein gaztelania hizkuntza ofizialak dira Euskal Erkidego Autonomoan. Baina, praktikan euskarak, erdara erabili ezean, ez duela balio ofizialik esaten digute errekerimendu eta helegiteen bitartez.

Egoera honen aurrean Anoetako Udalak adierazi nahi du:

- Anoetako Udalak euskara sustatzeko egiten ari den ahalegina berretsi du. Euskararen bidea beste eragile eta instituzioekin elkarlanean garatzeko konpromisoa adierazi nahi du.
- Gure herria berezia da hizkuntzaren ikuspegitik. Horregatik, udalerri euskaldunak, euskararen arnaguneak indartzeko, politika eraginkorrak abian jartzen saiatuko gara; hizkuntza politika euskara sailetik harago eraman, eta euskararen arnaguneak duten garrantzia aintzat hartuta, politika orokorraren erdigunean kokatzen saiatuz.
- Espainiako Gobernuak EAEn duen ordezkariak udalen jardunean eta bereziki euskara sustatzeko neurrien aurka izandako esku hartzea salatu nahi dugu. Espainiako Gobernuak EAEn duen ordezkariaren figura eta lana bertan behera uzteko eskatzen dugu.
- Eusko Jaurlaritzari eskatu nahi diogu euskara sustatzeko ahaleginean ari garen udalerri euskaldunetako Udalak babestu ditzan”.

8.- GALDE-ERREGUAK

Bat ere ez.

Eta beste aztergairik ezean, Alkate Jaunak amaitutzat eman du bilkura, arratsaldeko zazpirak laurden gutxi direnean; guzti honetaz, nik Idazkariak, fede ematen dudalarik.